

天台山方外志原序

顧起元

史莫良於志天地人物禮樂刑名至奧渺影蹟矣然而圖謀度數存焉虛可稽也實可錄也苟擅三長寧歎四善哉志莫良於山紀載之難有數端焉猿棲熊館鳥道蛇盤蠟屐從所未經樵斧絲來罕到卽有幽奇何緣覲覲雁宕徑僻於宋年黃海道登於明代非其驗與故真見難詳自昌黎慟哭於落雁之峰王陽迴馭於羊腸之阪文人墨客往往心快臥游具窮濟勝丹椒翠幕月磴天崖祇標異於登高眺遠之篇問問奇於牧豎樵夫之口言之若夢槩乎有聞信耳旣非任目逾舛山之真形

天台山全志

原序

從是遁矣故傳聞難據時易世移陵虛谷實擘隨方改字以俗訛石翳薛中疇視神清之洞門潛水底詎窺小有之天或古有而今無或此非而彼是文士疑而莫質野老泐而不知辨而析焉良未易也故考証難精經丘尋壑別引勝流攀木援藟必資曠日而或輶軒欲駕恨束馬之未能杖履以遊虞羸糧之不繼非倥偬而靡暇卽悵望而無力徒遙想於冥搜曷散懷於奮藻故結撰難富兼而有之者其惟無盡大師之志天台乎師以法中龍象坐大道場以舌上珠璣作大佛事墮舊志之未廣思靈跡之無徵析竹晨編然松暝寫緝爲山志數十

萬言自山名以及文章有涉茲山者罔不採其故實綴

彼菁藻至台教之真文高人之遺韻尤加詳焉頃以請藏金陵屬予爲序予受而卒業向之所難今之所易可謂冥通地絡潛鏡山靈勒遐寶於清都垂洪謨於法界者矣蓋其住山三紀振錫千峰徧尋不死之庭畢踐無人之境有勝必窮無險不陟與夫日游未奇耳剽多妄者異矣而又蘿封之字普入搜羅樹挂之錢咸資考索且日探月歷神畫形摹以故琪樹金松同檢桐君之籙墨池茶圃雙甄管子之題巨細不遺名實無爽又何有攷之未精撰焉未備者乎嗟乎覽應邵之記如禪岱宗

天台山全志

原序

披王履之圖若臨仙掌猶曰地以文奇境因語麗耳至若道元之注水經旁洽異書靈運之賦山居廣陳奇物千載而下等諷詠於登陟婉簡冊於丹青志而若斯斯已偉矣師之天台庶幾是乎若夫精詮教貫宏闡宗風霏法雨於松樞霍慈雲於蘿幌花飄座側樂鼓空中斯又地靈以人傑逾章山筍與海藏同久者也被楊衍常記伽藍慧遠曾經廬阜厥稱著矣豈如斯志名寄區中理存方外將使絕粒茹芝之客默引瑤梯餐風味道之侶羣登寶筏者哉

天台山全志序

東南名山天台最著顧地居海濱非負濟勝之具裹旬月之糧弗克遊遊亦弗徧余舅氏潘稼堂先生性好山水足跡幾徧天下所過名山無不探其幽窮其勝作為詩歌記序以誌快辛未歲遊天台有詩數十首遊記一篇余讀之不覺神往恨不能置身華頂峰頭觀日月出入胸與溟渤相吞吐也歲壬辰余房考張夫子以天官

陳序

大夫出守章安而天台在屬內私賀吾師得為名山主人可以不時登陟作為詩文以發山川之秘而自恨瓢繫京邸弗克負笈相從悵悒者久之及甲午余以請養歸籍往謁吾師謂台山庶幾可遊而時值炎暑病弗克登徒望靈山而俗士之駕幾為山靈所擯斥矣至乙未余以事至武林而吾師亦新遊台山來自省會復具言其勝并贈以遊山之資余遂得奮然於秋間先

謁吾師於章安而吾師方以山志無善本公餘之暇復取舊志手自刪訂與同幕顏子邇玉家曙升兩文學孜孜編纂而余亦適至任校讐之役為一時風雅盛事余亟請其書歸構善工刻之於是按途循軌遂作天台旬日之遊登赤城訪玉京過桐柏之故宮慨然見夷齊石像攬瓊臺之勝陟華頂之峰塵襟萬斛併入煙雲而俱化始嘆台山之不可不遊而余向於先舅氏遊

陳序

記中所見之山二十年神往而目存者一旦得身窮其境嗚呼是亦足快也已然向非吾師為台山主人主盟風雅則余以孱弱貧病之軀安能一再至而幾幾弗克遊者終得遊焉是余與天台其良緣迨從天假而復與於山志之役得附名不朽又何其幸也
賜進士出身翰林院庶吉士加一級前
特授內閣中書充武英殿書館纂脩吳江東谿

氏陳王謨謹識於溪上之德輝堂



陳序

三

天台山全志序

浙東山水之勝甲於天下而天台山爲最考諸羗邑乘其所述者脩矣幽岕邃谷千怪萬狀瑤臺瓊宇櫛比鱗次誠宇宙間一巨觀也斯殆造物者之巧特爲天地闢此奇境以爲仙佛之所窟宅雖極古今來騷人韻士與夫羽流釋子作馬序
爲文章播諸聲詩以形容夫幽奇之態終未能盡其萬一也予垂髫時侍先大人官於浙即知有所謂天台山者心竊向往之然猶未嘗見其全志而熟悉其勝槩也茲奉

簡命視學兩浙私自幸以爲涉錢塘過會稽因而之閩門高士仙侶之所

居以償三十前之夙願。按行台罷從檐帷中遙望層巒疊嶂峭拔聳秀未嘗不凝眸注視悠然神往也。特以公事未竣不敢遽作登臨想適郡守張君覺菴以天台志示予披覽之餘其山峙川流仙踪佛跡以迄景物之奇詩文之工無一不備載其中恍若身

馬序

遊其地而親見其稷向之數十年來徒托諸夢想而不得一見者忽於是焉遇之不可謂非余之幸也及予將之溫道經雁宕龍湫諸勝見奇峰萬仞瀑布千尋幾令人歎觀止矣然晉人嘗有遊雁宕自謂海內名山無有勝此及登天台又恍然自失其規模宏大當更有異

焉者予今日得見雁山尤不能不以未遍歷天台爲憾異時校讐稍暇得以登臨嘯傲於其間相與窮幽極渺以畢平生之志殆將以張君爲東道主乎張君以名進士來守是邦其政事文章嘖嘖人口予見其士習之敦樸文風之醇正知有得於張君之教育浚矣而張君猶

馬序

以歲歉民貧不勝惓惓其用心爲何如也今閱是編搜討之精網羅之富令人睹其志愈想其勝由是而願遊者日以衆題詠者日以多山靈應爲之生色不獨台之士民樂得有賢太守卽台之山水亦樂得有賢主人也是爲序

康熙六十年辛丑菊月督學使者扶風



天台山全志序

周禮大司徒掌建邦之土地周知地域廣輪之數職方氏則辨九州之圖使同貫利故凡郡邑名山大川皆吏茲土者所當稔知也自山經地志相沿而名山之志以興其中形勝之險塞物產之宜否以及古今文獻之考證皆於志乎詳

王序

之此於民生吏道實有係焉豈徒侈陳博雅取媚山靈云爾哉天台固山之知名者也山顯於典午支謝諸公而興公一賦金聲可擲後有明高僧輯方外志一書猶惜其簡而未全郢中張君覺菴來守是邦者數年予既嘉其政績庶幾古賢二千石之風今者以公事來會城

出所纂天台全志相眎且索弁其簡端
子披閱終編見其網羅考訂不蕪不漏
洵志之善者且遐搜博采務得山之全
體與昔人所云周圍八百里處五縣中
央者相符不爽不大為山川增色乎夫
予生平宦轍所經之閩之蜀之楚之吳
越所見隨山喬嶽危峰飛嶂烟雲變幻
奇偉萬狀者不可殫述而天台一山但
於幃帷中一仰止之遊屐未展恒覺闕
如今觀張君全志所錄恍如渡石梁陟
華頂懷夷齊之清風尋劉阮之遺跡而
赤城霞氣蔚蔚然襲予衣也則覽是書
者不較勝於張圖臥遊者哉明李於鱗
與徐子與書云太守甚苦書策稠濁吏

事旁午經術文詞一切無恙乎蓋文學
吏治兼之為難今張君以公餘輯是書
既不違仕優則學之義而編中所載於
古之山經地志有加詳焉其與司徒暨
職方所掌亦庶乎有合也遂不辭而為
之序

浙江等處提刑按察使司按察使加四
級王之麟撰



天台山全志序

天台山始見內經山記以及顧愷之支道林謝康樂孔靈符輩通有載記獨孫興公圖狀作賦才藻葩流其名甚著自時厥後薦紳先生與夫緇流羽人遊覽棲託者屐齒相接述造之多見於文集暨蒼岬薛壁之間不可勝錄前代浮屠

注序

傳燈編以為誌其發凡起例於山經地志之體未知何如然大槩侈於洞天福地之說旁及幻變恍惚博物者難以徵信也且版因歲久漫漶不重加增輯或至傳譌失正恐貽名山之媿吾鄧張君覺菴博雅君子也由吏部來守是土風清俗美人物豐樂乃於聽事閒暇集郡

士之賢而多識者相與重新釐訂搜討

摭摭刪繁去蕪務歸爾雅不以一處求勝而以全體論山其為文博而不支簡而不漏非苟然者古大夫登高能賦山川能說所謂德音之一於行役猶然况身官其地適得明神隩區而志又職方所繫顧聽其蕪沒已耶台去永嘉不遠

注序

昔靈運作郡遂肆意傲遊理人聽訟不復關懷今張君之與山水謀者都無政事廢弛之失而吐納靈秀牢籠物態不煩穿屐開徑足以張敘神臯俾後之觀者以為茲山之實錄其得失又何如乎余故樂其志之成而為之序

康熙五十六年仲夏兩浙督學使者江

夏汪滌書於嘉禾試館之慎獨齋



汪序

三

天台山全志序

舊稱天台山高一萬八千丈周圍八百里山有八重四面如一洞天福地與方丈蓬萊等夫山之高不可得而考也若計其周圍則今自赤城以至澄深由筋竹以至萬年縱橫不過一二百里耳安在其為八百哉考縣舊志邑故始豐地至宋建隆始改為天台縣前後沿革或隸會稽或隸東陽或隸永嘉章安時移代易分析不同考范侍郎志要謂天台山處五縣中央即赤城舊志所指餘姚勾章臨海天台剡縣則知所謂天台山者逶迤延袤幅幘甚廣亦無定在故縣可界而山不可界後人遂以縣界而分

張序

十

山於是山之不屬於縣者即遊屐所不到矣故統而論之山自會稽而來天姥石城皆台山也寧海之筋竹王愛皆台山也嵎縣之金庭桐柏亦台山也雖各有其名各具其勝要皆台山之屬耳而必以隸於縣者爲天台是失山之全體矣予素有山水之好壬辰春出守章安

張序

一

私喜名山在隸可朝夕遊乃蒞任四載王事倥傯時或過之徒神往耳今丙申秋歸自省會始得信宿縣境歷覽名勝探奇索隱塵襟俗慮一時盡滌登高遠眺曠然四望天姥括蒼諸峰可指而數大海錢塘歷歷在目既暢生平之大觀而益知向所云八百里者其綿亘固不

止赤城桐柏華頂瓊臺諸山之勝而又以境治遙隔不得遍歷諸勝爲憾也因急索山志考之而自唐以來如神邕圖經等書文獻之家鮮有存者惟明萬曆間僧人傳燈著有方外志一冊採輯頗詳筆鋒俊爽而惜其泥於方外似志釋而非志山又其所採僅在一縣之內而

張序

二

山之入於旁縣者未有所錄因於公餘之暇刪繁去蕪并廣采新昌寧海嵎縣名勝之通於台山者彙而輯之與夫郡人之詩若文足以發揮山川之秘者咸博訪而徧纂焉凡皆以爲山而載名曰天台山全志山靈有知其或快數百年之割裂一朝而復而後之遊者得其全

體其幽奇勝致所得當更倍於前人也
夫

時康熙五十六年歲次丁酉

賜進士第中憲大夫加三級知台州府事

前吏部驗封司郎中楚郢張聯元覺菴
氏撰

張序



四

天台山全志序

少壯宦遊足跡遍於天下其間山川之
鉅麗巖壑之邃美為平時所慨慕而遐
跂者幸皆得指識其地然停輿繫纜假
數日之程而身親遊歷者十不三四則
又所悵焉者也惟是博搜方輿地志及
勝覽勝概等書緝閱把玩如昔人張圖

樂序

一

畫於壁以資臥遊所苦操筆者裁鑿不
精採取無法惟以名勝之在人耳目者
為之重複牽綴而於山之起伏水之源
流槩置勿考則亦陋略甚矣蓋作史者
莫難於作志而山水雜志即班氏地理
志之一非具才學識三長者不能為也
昨歲恭承

簡命觀察浙東深喜四明天台皆在所轄之內得以公餘乘興而夏間以事至台信宿縣境深入仙窟瞻眺石梁并瓊臺赤城諸勝莫不次第涉歷向之所謂悵焉者今始得快然矣特是真誥中有山高萬八千丈周圍八百里之說又登真隱訣云山處餘姚勾章臨海天台剡縣

梁序

二

五縣中央而前之作志者何止以天台一縣言也適台刺史張君覺菴以所輯天台全志請予弁首縱觀其書始知所云全者已兼五縣之地志之五縣之地盡而八百之說可無疑焉於是志成而台山之全體始現似從前缺漏天故斬其奇秘以待張君之開鑿也至搜羅

之富考訂之審更不待言昔人謂孫興公一賦大爲山靈增色不知見是志者又當云何張君以名進士起家胸中淹貫全史其才學識於此見一斑矣是爲序時

康熙丁酉歲長至後一日浙東觀察使

壽春梁文煊闇齋氏撰

梁序

三



重輯天台山志啓

竊惟瀛洲表異海外共想神山靈越正基宇內聿尊台
嶽五芝八桂孫興公既奮藻於前萬壑千巖白玉蟾欲
乘風於繼望石梁以天矯銀河偏鎖長虹仰天柱以峻
嶒金闕還籠翠黛宮開桐柏休文欲解紱抽簪山拱鳳
凰純陽覓度人換骨結廬盤石厥號靈墟宴坐脩林爰
鐫佛隴呼吸堪通帝座詩思在華頂峰頭躋攀直抵天
門春色滿藤公嶺外玉霄疊嶂猶聞襲美之詩天姥重
崖曾入青蓮之夢高明為翻經而始方廣與蓋竹為鄰
路入桃源芒屨便通雙闕水分龍母星槎直走滄溟赤

天台山全志 啓

城聳天半朱霞疑樹漢家之幟危瀑掛雲間白練憑誇
陸氏之經允矣洞天共賞靈仙窟宅誠哉福地寧讓蓬
閭煙嵐而且玉宇瓏房原稱參錯瓊林瑤圃更爾璘璠
勝尋丈之天桃花開躑躅配龍葱之巨竹室護琅玕鶴
翎寔域外之葩琪樹豈人間之種黃精甘醴仙餌紛紛
紅木香茅靈苗郁郁從來羽士惟此藏丹亦有緇流於
斯卓錫訪伊人於空谷誰傳真逸芳踪問脩景於槃阿
祇有傳燈舊志夫八重繚繞奇峰原聚於仙都而五縣
迴環勝致尚標於別邑金庭一觀照耀剡東王愛諸山
蜿蜒回浦乃未將圖經備攷而祇以邑乘為憑以致闕

焉未詳亦或存而多穢

聯元

賞心幽壑作更名區未辭

案牘之繁空憶間丘遺蹟每有山林之興長懷司馬高
風念居郡守四年擬輯天台一志必藉遠搜文獻庶幾
廣擴見聞如或錄有名篇或藏有善本或山間古碣未
蝕蘚苔或室內穹碑猶明鈎畫或名公鉅卿之記詠或
文人騷士之歌吟或黃冠闍士即景寫懷或旅屐遊筇
登高作賦或存全部或僅短章不以古今是限亦勿多
寡為拘但係何代之人更屬何方之士務詳梗概勿使
差謬各檢曹倉共尋鄴架藉貽逸韻用集新編倘屬二
酉秘藏亦期一紙借覽隨當完璧豈有爽言幸勿吝金

天台山全志 啓

啓

二

王之音庶共闡山川之蘊云爾

天台山全志卷之一

楚郢張聯元覺菴輯

凡例

一天台無主山主峰為諸山之總稱周圍八百里源自括蒼天姥而來方外志謂從關嶺過脈誤頂對三辰當女牛分野上應台宿孫綽賦云落五界而迅征李善註五縣之界謂餘姚句章鄞剡始寧舊赤城志載棲山登真隱訣云大小台處五縣中央註謂五縣係餘姚句章臨海天台剡縣蓋因建置沿革不一故也今實界天台新昌嵯縣臨海寧海五縣中央明釋傳燈恐靈蹟無

天台山全志

卷之一

徵輯天台山方外志采故實而撮菁藻誠為山靈寫照但山川名勝止以天台邑乘為憑則所云周圍八百里處五縣中央者似屬無謂子覽而惜之因於公餘涉歷台山旁採各志以補前志缺略名曰天台山全志

一天台山高一萬八千丈惟華頂峰為台山最高處下瞰眾山如龍虎盤踞旗鼓布列之狀又如蓮華為華心之頂故名潘慎詩云此是名山第一層是也舊赤城志與郡邑志俱載天台山為首方外志舍天台山不敘豈以無主山主峰故耶茲敘山仍首天台敘峰

則首華頂敘寺則首善興宗天台而尊華頂亦高山仰止之意也

一神邕山圖以赤城為南門新昌石城為西門徐靈府以剡縣金庭觀為北門方外志中形勝考一篇核敘詳明以金地佛隴寒風關察嶺為南門第一支螺溪幽溪為南門第二支檣溪歡溪靈墟為東門第一支王愛筋竹為東門第二支大同澄深摘星石笕為北門第一支慈聖金庭觀為北門第二支會墅彩煙天姥為西門第二左支關嶺秀溪白巖萬年為西門第二右支此皆以華頂為主而各門環向但將華頂亦

天台山全志

卷之一

混列於西門石橋斷橋混列於北門青溪女梭福聖桐柏俱混列于西門則誤矣子謂應以金地至察嶺為南門黃振幽溪螺溪為東南門王愛筋竹為東門第一支靈墟為東門第二支大同澄深為東北門慈聖金庭為西北門石橋斷橋萬年藤公會墅天姥彩煙為西門桃源關嶺白巖秀溪桐柏為西南門則以天台華頂為宗主而八門定矣

一山志皆有圖而天台延袤既廣圖其全則累幅難窮若寫其一峰一巒則如八景之類未見全壁况嵐光翠色與時變換原非圖畫所能模倣故不欲漫漶以

資唐突山靈之訃

一 顧野王輿地志云天台山一名桐柏衆嶽之最秀者也天台縣西北崇道觀曰桐柏山寧海縣西四十里葛元煉丹處在天台極東亦曰桐柏山嵯縣東八十里亦曰桐柏山山之西有金庭觀真誥云天台山周圍八百里是言天台而桐柏在其中又云金庭桐柏山周圍八百餘里一頭在會稽東海際一頭入海中

絲漢時章叢屬會稽郡至吳赤烏二年始析會稽東部置臨海郡且云一頭在東海際一頭入海中是言桐柏而天台在其中矣故天台山南至黃壇嶺

天台山全志

卷之十

王

十五里 北至龍公馬嶽 澄深寺北三十里 寧海縣新昌交界 東至海際西

至天姥彩煙始符山有八重周圍八百里之語并應以天台縣之桐柏山為中桐柏寧海縣之桐柏山為東桐柏嵯縣之桐柏山為西桐柏

一 台邑西八十里天柱山而外與東陽縣分界尚遠東四十里至筋竹東北六十里至靈墟即與寧海分界其大同之東澄深之北俱屬寧海分界故寧海一邑北自天門闔風臺南至桑洲小桐巖百有餘里間皆為天台山左臂

一天台山八百里中層巒疊嶂奇峰邃壑起伏翔舞千

態萬狀志中山峰巖嶺名目不能捫蘿越磴備考悉載尚有待於康樂冥搜之展也

一 徐靈府云赤城山有瑤花芝草柳泌亦言天台山多芝草異藥故琪樹賦於興公金松賦於文饒鶴翎則花如芍藥杜鵑則高絜紫薇靈葩翠莖俱非常產其食物則黃精黃獨菖椹芋栗之屬藥物則交藤茯苓仙茅根子之屬俱勝於他處若穀蔬蟲介之繁不能概載

一 山中非有社稷城隍學宮之祀但有祠宇列於山中或可式靡維風或能興雲致雨亦別列一條

天台山全志

卷之十一

四

一 台之為郡萌芽於漢至唐改為台州志云以天台山而名是時猶為僻左惟釋道二氏六朝時即早著見聞偉殿穹堂上摩霄漢洞天福地大書圖籍宮觀寺宇之富實台山為最今道觀十廢其九僧寺亦十廢其三子姑仍其舊而存之

一天台山為神仙窟宅羅漢隱居雖不無荒唐過實然晨肇桃源已有其地根碩赤城亦有其山至於孝先稚川洪景平叔瓊瑄之徒著書養真原非凡骨而司馬承禎與陳子昂李白王維賀知章輩為仙宗十友笑捷徑於終南著坐忘於桐柏即蟬蛻非真其高風

可仰僧如曇猷智顛灌頂德韶輩俱有盛名而寒山拾得踪跡神異題詠頗多間遠此卽所謂應真示現而人不之識耶因次列仙道志次列釋志

一 古今代謝勝蹟未堙如書堂墨池遺鐘舊竈並或居址可考手翰可徵字鐫石上塔聳雲間俱令人徘徊空谷眺詠幽奇至於片石久埋碑文零落亦錄某人某時所撰以附於古蹟之末若攬勝亭臺以及從前珍寶俱載於寺觀之下毋庸複入

一 羽仙身未到於台山並雜志或涉於渺幻雖有其事竝入存疑

天台山全志

卷之一

五

一天台山名勝甲天下列代文人韻士登高賦詠者多矣古今名作存者盈篇累冊一景之下不能多列用另分卷帙仍以地名貫之以便稽考其散軼無存道遠莫致或祕於石室珍於幽人見聞未逮無計搜羅難免掛一漏萬之謂維博雅君子輯而續之

一 所載詩篇惟摹寫山川名勝非因人品臧否去取故雖亡宋如秋壑而石橋一律亦不以人廢

一天台山名勝久著四方遊覽以及近地棲隱固多名賢本名之下止就見聞所及稍敘爵里若遊屐偶臨餘俟考訂續爲序列

一 是書於丙申秋始行採輯丁酉春開雕夏季卽告竣爲期既促而四方郵寄詩篇多有未至或一題已完復寄有佳製則另爲續刊其題前後未免重出然將來作者便可隨時付梓

天台山全志

卷之一

六

形勝考

釋傳 燈

天台山高一萬八千丈周迴八百里山有八重四面如一復有四門智者大師以赤城為南門以新昌石城為西門徐靈府又以剡縣金庭觀為北門余謂準此當以王愛山為東門或者疑以為誕不知皆有所徵也蓋名山福地必有神聖呵衛不祥惟此台山自古及今無有虎豹之暴曾以是訊諸山民僉曰四門之內周環民居即有惡獸經由惟犬羊等物是殘見人則妥尾走匿草莽間審如是則所謂聖僧道場神僊窟宅信矣若取之則凡在台州屬境皆其區域以牛女分野何啻千里故

天台山全志

卷之十

七

唐宋已來以台州名郡蓋取乎此若約靈異以分山憑諸書以割地則自縣治以南皆非也然台鴈二山皆東南勝境古人未有定其優劣者余始遊鴈宕見其峰巒秀拔奇形怪狀將謂海內名山無有勝此及登天台山觀其規模宏大又恍然自失因而品曰鴈宕山其猶李青蓮之五言古詩也天台山其猶杜拾遺之五言古詩也以子美之詩上薄風雅下該沈宋言奪蘇李氣吞曹劉掩顏謝之孤高雜徐庾之流麗盡得古人之體勢而兼昔人之所獨專近之故也蓋此山在下望之不啻千仞及昇其巔四通八達間皆可數十里如在平地其勝

一也至登華頂峰頭東望大海南觀鴈宕西矚括蒼北眺錢塘一覽可盡其勝二也俯瞰羣峰皆在其下羅列環連或如蓮葉或如華鬚恍疑一朵芙蓉浮於海上其勝三也僧寺道院桑麻相接鐘梵鳴於天上雞犬吠於雲中其勝四也雖極其幽邃之地皆明爽開豁使人襟抱蕩然其勝五也山與通衢左近車馬絡繹其下勝概羅列其巔可望而不可到其勝六也山無背向四面如一其勝七也山有八支八溪為界以華頂為車軸山之周遭如八軸輪亦如八葉覆蓮其勝八也山產衆藥又多肥蕨黃精此足供居者糗糧其勝九也山林深遠即

天台山全志

卷之十

八

居民亦有未臻其奧者可以避隱其勝十也且赤城為其南標石城為其西固東蒼為其眉四明為其目中有瓊臺雙闕佛隴香鑪石梁瀑布等諸景骨肉不偏形神俱妙所以為勝也此其梗槩耳若夫赤城建標珠林簇簇誰其淡諸霞紅雲綠則有赤城山之勝五峰環翠宮殿俱高雙澗奏響和以松濤則有國清寺之勝溪界山出路沿澗入瀑布龍湫涼風襲襲則有金地道中之勝金地在壁立萬仞蒼龍委蛇濟以天磴則有金地嶺之勝竹塢茆茨疎磬間發法語琅琅金繩寶筏則有定光菴之勝古塔皇封與山巖從瞻之仰之萬世高風則

有真覺寺之勝法流洙泗佛道康莊晉賢境界脩禪道
塲則有佛隴大慈寺之勝大雷峰下白雲精舍數里平
原幽人命駕則有太平寺之勝路入羊腸身親龍關山
橡藤梨美哉膚核則有寒風闕道中之勝亦有桑麻非
人間者豈軒轅丘廣莫之野則有長壽文殊西竺諸寺
之勝萬山之中其嶺陂陀若槃之宮尚餘煙蘿則有察
嶺下高察舊隱之勝此南門第一支取華頂之直道以
南鼻溪爲界也若夫放生池上碧水盈隄有物龍去猶
名螺溪則有清心寺之勝長松數挺野廟披離昔人傳
教今歸與誰則有傳教寺廢址之勝疊嶂千重溪梁百

天台山全志

卷之一

九

折泉落樹頭流雲噴雪則有螺溪道中之勝仰攀丹崖
危磴半欹梯雲捫葛乃可探奇則有幽谿嶺之勝幽谿
講肆車塵不喧山林盤鬱別有乾坤則有高明寺之勝
路隔三山可望難卽松篁數家泉流上泐則有清涼寺
遺蹟之勝下有寒泉藏蟄神龍石筍高峙砥柱虛空則
有螺螭潭之勝溪南溪北上游下游經梵相聞以耕以
脩則有黃壇諸菴之勝聖僧西歸惟遺雙屐精神不磨
竟化爲石則有聖蹟內外菴之勝此南門第二支取華
頂之紆路以螺溪爲界也若夫雲林覆殿寶篋藏經諸
天散花神鬼來聽則有慧明寺之勝覺路平平好山相

迎谷風溪水且輕且清則有楸溪道中之勝山藏太古
水奏琴心惟昔高士允矣知音則有齊高士顧歡隱處
之勝水窮山盡有地靈墟盤石可坐精廬可居則有天
封寺之勝此東門第一支取華頂之直道以楸溪爲界
也若夫丹山夷夷草木萎蕤何獨王愛我亦愛之則有
王愛山之勝脩竹千竿蘭若數楹長者福聚衲子化城
則有筋竹嶺菴之勝雲生足底人行天上誰挈我衣空
中五兩則有彌陀菴仰天湖道中之勝此東門第二支
取華頂之仄徑以水母溪爲界也若夫山光明媚水色
澄鮮真阿練若樂矣三禪則有澄深寺之勝猿梯達漢

天台山全志

卷之一

十

鳥道通玄疑其登者居日月邊則有摘星嶺之勝山藏
八景高僧所安彼如菴主其塔猶完則有大同寺之勝
瑞草藉地拱木蔽天禽猿嘯聚杳無人煙則有石笕道
中之勝此北門第一支取華頂之岐路以羅木溪爲界
也若夫神僊福地茅竹洞天金庭觀側義之家焉則有
金庭觀之勝路崎而勝水險而清籃輿竹筏恣我南征
則有福溪道中之勝山奇蹟聖佛慈如如豐碑古記元
章之書則有慈聖寺之勝方廣觀面伊誰能見八萬度
門聊通一線則有石梁橋之勝瀑瀉懸崖石潭淙淙奇
哉誰設元龍之功則有斷橋之勝此北門第二支取華